

UM mohon maaf, kesal kenyataan kontroversi Dr Bruce Gilley

Oleh [Ercy Gracella Ajos](#) - April 25, 2024 @ 1:42pm
bhnews@bh.com.my



Bruce Gilley. - Foto X

KUALA LUMPUR: Universiti Malaya (UM) tampil memohon maaf kepada semua pihak sambil melahirkan rasa kesal terhadap kenyataan kontroversi dibuat seorang profesor dipercayai pro-Israel, ketika tampil sebagai penceramah jemputan universiti itu.

Pusat Komunikasi Korporat (CCC) UM dalam kenyataannya, berasa kesal dengan kenyataan kontroversi serta tidak menghormati sentimen masyarakat seperti tular di laman media sosial.

Katanya, laporan lengkap berhubung isu ini sedang disediakan dan tindakan tegas akan diambil terhadap mereka yang didapati terbabit dengan isu ini.

"UM turut memandang serius perkara ini dan memohon maaf kepada semua pihak," katanya dalam kenyataan hari ini.

CCC UM berkata, pihaknya mengambil maklum saranan Kementerian Pendidikan Tinggi itu dan sudah mengambil tindakan serta merta membatalkan sebarang program dan aktiviti yang dijadual dihadiri penceramah jemputan warga asing.

"Demi memastikan perkara seperti ini tidak berulang, UM sedang menambah baik prosedur dan garis panduan yang lebih ketat, terutamanya semakan latar belakang mana-mana individu atau pihak yang akan bekerjasama, termasuklah kajian penilaian risiko profil media sosial.

"Dalam pada itu, UM juga turut mengecam kenyataan terbaharu individu tersebut berkenaan aspek keselamatan mengembara ke Malaysia," jelasnya.

Katanya lagi, itu adalah kenyataan tidak bertanggungjawab dan melampau yang boleh mencetuskan kemarahan seluruh rakyat Malaysia.

Terdahulu BH melaporkan, Kesatuan Mahasiswa Universiti Malaya (KMUM) menggesa pentadbiran UM memberi penjelasan berhubung tindakan membenarkan seorang profesor dipercayai pro-Israel, Dr Bruce Gilley, tampil sebagai penceramah jemputan ke universiti itu.

KMUM dalam kenyataannya berkata, kenyataan penceramah terbabit dalam syarahannya menjadi satu perkara yang mencetuskan fenomena dalam kalangan mahasiswa UM, malah membangkitkan kemarahan ramai pihak, termasuk KMUM.

"Kebebasan berakademik tidak salah, akan tetapi apabila syarahan tersebut dijadikan ruang untuk menyebarkan dakwah Zionis.

"Kecuaian yang disengajakan pihak UM menjemput ahli akademik tersebut yang mempunyai rekod kontroversi lampau tidak boleh dijadikan alasan lagi," katanya.

Pada 9 April lalu, Institut Pengajian Cina UM mengeluarkan jemputan terbuka untuk seminar yang bertajuk "REASSESSING REPUBLICAN CHINA" yang menampilkan Bruce Gilley pada 25 April 2024.

Pada 16 April lalu, Jabatan Pengajian Antarabangsa dan Strategik mengumumkan program Visiting Professor Program 2024 (Program Profesor Pelawat 2024) dimana Bruce dijemput untuk menyampaikan syarahan dan mengendalikan bengkel selama tiga hari mulai 22 sehingga 24 April lalu.

Pada hari kedua (23 April), ketika menyampaikan syarahan yang bertajuk "Will Malaysia Become an Active Middle Power?" Bruce mengeluarkan kenyataan berbunyi "A country whose political leaders advocate a second Holocaust against the Jewish people will never be a serious player in world affairs, and will certainly never be a friend or partner of the United States" ketika memberi syarahan.

Kenyataan itu kemudian dikongsikan semula menerusi ciapan di laman X milik peribadinya, yang menarik perhatian masyarakat Malaysia terutamanya mahasiswa UM.

Susulan insiden itu, KPT turut mengarahkan sebarang program dan aktiviti yang dijadual dihadiri seorang penceramah warga asing yang mengeluarkan kenyataan dilihat mencetuskan kontroversi dan tidak menghormati sentimen masyarakat seperti tular di media sosial dibatalkan segera.

Menterinya, Datuk Seri Dr Zambry Abd Kadir, dilaporkan berkata pihak kementerian mengambil maklum dan memandang serius berhubung isu yang berlaku itu.

"Susulan itu, saya sudah mengarahkan sebarang program dan aktiviti yang dijadual dihadiri penceramah berkenaan dibatalkan segera.

"Saya turut meminta UM untuk menyiasat perkara ini dan melaporkan segera butiran lanjut," katanya dalam kenyataan malam tadi.